



KEMENTERIAN SUMBER MANUSIA

## SIARAN MEDIA

---

### KESUMA KOMITED MEREALISASIKAN ASPIRASI TVET 2.0 MELALUI DANA RM50 JUTA

---

**PUTRAJAYA, 6 JUN 2026** – Menteri Sumber Manusia, Dato' Sri Ramanan Ramakrishnan merakamkan setinggi-tinggi penghargaan dan terima kasih kepada YAB Dato' Seri Anwar Ibrahim, Perdana Menteri Malaysia atas pengumuman peruntukan sehingga **RM50 juta daripada dana Program Berimpak Tinggi di bawah Perbadanan Tabung Pembangunan Kemahiran (PTPK) bagi menyokong pelaksanaan TVET 2.0 sempena Sambutan Hari TVET Negara 2026.**

Menurut beliau, Kementerian Sumber Manusia (KESUMA) akan memastikan peruntukan tersebut dimanfaatkan sepenuhnya bagi pelaksanaan program-program berimpak tinggi dalam usaha memperkasa perusahaan Mikro, Kecil dan Sederhana (PMKS) serta mengarusperdanakan Pendidikan dan Latihan Teknikal dan Vokasional (TVET) sebagai laluan utama pembangunan bakat dan kerjaya negara. Inisiatif ini juga akan membantu memperkukuh ekosistem pembangunan kemahiran negara bagi memenuhi keperluan tenaga kerja masa hadapan.

“Peruntukan ini mencerminkan komitmen berterusan Kerajaan MADANI dalam membangunkan bakat masa hadapan negara yang berdaya tahan, berkemahiran tinggi dan sejajar dengan keperluan industri. Inisiatif ini juga selari dengan aspirasi Pelan Malaysia Ke-13 (RMKe-13), Pelan Induk Perindustrian Baharu (NIMP) serta Pelan Hala Tuju Peralihan Tenaga Negara (NETR) yang menekankan pembangunan modal insan sebagai pemacu utama pertumbuhan ekonomi negara,” katanya.

Menteri KESUMA yakin peruntukan yang diumumkan oleh YAB Perdana Menteri ini akan membuka lebih banyak peluang kepada golongan belia, pekerja dan usahawan PMKS untuk meningkatkan kemahiran serta menyertai sektor-sektor ekonomi bernilai tinggi. Pada masa yang sama, inisiatif ini akan membantu negara memenuhi

permintaan tenaga kerja mahir yang semakin meningkat, sekali gus memperkukuh daya saing Malaysia sebagai destinasi pelaburan dan hab bakat serantau.

Beliau berkata dana tersebut akan disalurkan bagi pelaksanaan program-program berimpak tinggi di bawah penyelarasan Majlis TVET Negara (MTVET) dan Perbadanan Tabung Pembangunan Kemahiran (PTPK), dengan fokus kepada sektor-sektor strategik termasuk Elektrik dan Elektronik (E&E), ekonomi hijau, ekonomi biru serta ekonomi jingga yang dikenal pasti sebagai bidang pertumbuhan baharu dan berpotensi tinggi.

Dato' Sri Ramanan turut menyambut baik penegasan YAB Perdana Menteri bahawa peruntukan RM50 juta ini perlu diterjemahkan kepada tindakan yang berimpak melalui kerjasama erat antara kerajaan, industri dan institusi latihan. Beliau berkata sinergi tersebut akan memastikan program TVET sentiasa responsif terhadap perkembangan teknologi baharu, keperluan pelabur serta permintaan tenaga kerja berkemahiran tinggi negara, sekali gus mempercepatkan transformasi ekosistem TVET dan memperkukuh agenda pembangunan bakat Malaysia MADANI.

## **KEMENTERIAN SUMBER MANUSIA**

**06 JUN 2026**

**LAMPIRAN****LATAR BELAKANG KESUMA**

Kementerian Sumber Manusia, atau singkatannya KESUMA, ialah kementerian yang bertanggungjawab terhadap pembangunan kemahiran, pekerjaan, keselamatan dan kesihatan pekerjaan, kesatuan sekerja, perhubungan perusahaan, maklumat dan analisis pasaran buruh serta keselamatan sosial.

**PERANAN & TANGGUNGJAWAB KESUMA**

Membangun dan melahirkan modal insan yang kompeten, produktif, responsif dan berdaya tahan dalam pasaran buruh negara ke arah meningkatkan produktiviti negara. KESUMA juga berperanan memastikan kelancaran operasi pasaran buruh, meningkatkan kebolehpasaran dan penggajian tenaga kerja tempatan, mewujudkan perhubungan perusahaan yang harmoni dan kondusif, mengutamakan keselamatan dan kesihatan pekerjaan serta memperkukuh jaringan keselamatan sosial yang komprehensif, dinamik dan progresif.

**JABATAN DAN AGENSI DI BAWAH KESUMA**

<b>KEMENTERIAN</b>	
Bahagian Dasar Unit Koordinasi TVET (UKTVET)	
<b>JABATAN</b>	<b>AGENSI</b>
Jabatan Tenaga Manusia (JTM)	Pertubuhan Keselamatan Sosial (PERKESO)
Mahkamah Perusahaan Malaysia (MPM)	Institut Keselamatan Dan Kesihatan Pekerjaan Negara (NIOSH)
Jabatan Pembangunan Kemahiran (JPK)	Human Resources Development Corporation (HRD Corp)
Jabatan Keselamatan dan Kesihatan Pekerjaan (JKKP)	Talent Corporation Malaysia Berhad (TALENTCorp)
Jabatan Tenaga Kerja Semenanjung Malaysia (JTKSM)	Perbadanan Tabung Pembangunan Kemahiran (PTPK)
Jabatan Perhubungan Perusahaan Malaysia (JPPM)	
Jabatan Hal Ehwal Kesatuan Sekerja (JHEKS)	
Jabatan Tenaga Kerja Sabah	
Jabatan Tenaga Kerja Sarawak	